

tout ce qu'ils vouldroyent. Et lors le menerent deuers les gensdarmes Pretotians, pour auoir leur consentement, avec celuy du Senat, & de tout le peuple Romain: lesquels tous ensemble s'accorderent facilement à l'election d'un tant homme de bien: apres laquelle encore regimboit-il, & ayant pris par le poing Glabrio, le premier & plus notable de tous les Senateurs Romains, le vouloit faire seoir en la chaire Imperiale, à laquelle toutesfois par belle cōtrainte il s'assist à la parfin. Mais son Empire fut de bien peu de duree, à sçauoir, de quatre vingts & cinq iours seulement, & fut pauurement tué par la faction de Latus (qui l'auoit fait Empereur) & des gensdarmes Pretotians, sur tout auares: non sans le sceu & desir de Didius Iulianus, qui fut son successeur. Pertinax vescu 71. an, avec reputation telle qu'un homme de bien peut acquerir en son viuant, comme plus à plein Herodian historien Grec, a laissé par escrit.

5.

LA cinquieme & derniere figure de ceste planche, est de Pescennius Niger Iustus, laquelle est apposee icy pour la rarité de sa medalle. Il fut, sous l'Empereur Septimius Seuerus, chef de l'armee Romaine en Syrie, & nommé Auguste en Orient: mais à la fin surmonté & vaincu par ledict Seuerus, plus caut & fin que luy, finit sa vie, s'estant retiré & caché aux faulxbourgs de la ville d'Antioche, où ses ennemis le trouuerent & luy osterent la teste.

Declaration de la seconde table marquee B.

1. 2. 3.



EST E premiere figure & portrait, est d'une mienne fort belle medalle d'argent, Grecque, & faite pour un didrachme, c'est à dire, du poids de deux drachmes Attiques, & quelque peu moins de deux treseaux, ainsi que parlent les Orfeures. Elle est un peu vice à force de manier, dont elle en pese moins de quelque nombre de grains. Quelques vns veulent que ce soit la face d'Alexandre le Grand: mais i'aduerti le Lecteur, qu'en ces medalles Grecques il faut bien aduifer & soigneusement discerner, si tels visages sont d'Alexandre le Grand, ou bien de la deesse Pallas Attique, armee & ayant le morion en teste. Elle estoit fort honoree entre les autres dieux, à Athenes: & estoit sa face souuent apposee aux mon-

V.ij.